

四庫全書

史部

欽定四庫全書

世宗憲皇帝上諭內閣卷九十六

雍正八年七月

上諭十八道

初五日奉

上諭武藝者乃滿洲之根本要務八旗管轄兵丁之大臣  
官員理宜操練武藝習勞苦耐寒暑以及疾趨超距撲  
跌等技近觀大臣官員侍衛等值班俱不親佩腰刀今

家人持攜及至紫禁城內方行親佩似此一味偷安總不操練服習勞苦成何道理即如吳達納係由盛京兵丁選取侍衛之人差往打牲烏拉地方逸居一載遂至跟轎一班即喘息不能行走來文原在執事人內行走曾經服習勞苦之人今年僅五旬竟不能跟轎哈岱在侍衛執事人內行走多年出征隨圍俱經身歷至跟轎一班亦不能行走此皆自圖安逸之所致也大臣官員若不於平素間服習勞苦倘至緊要處不能爭先將使

兵丁竟捨伊等前進乎抑停留等待乎且至彼時力不能支即懷奮勇之心亦屬無用若此何能使兵丁精銳耶從前

皇考時常行圍衆人得以學習技勇未致廢棄俱能服習勞苦及朕即位仰思

皇考付託之重八年以来勵精圖治未及巡幸郊外近觀武職大臣侍衛官員兵丁漸不及前若不嚴令學習勢必流於不堪任用嗣後八旗武職大臣官員及各省駐防

之武職大臣官員年未至五十五歲者勒限半年令各奮力學習一切技勇若仍有自圖安逸不肯學習稍有所勞即至汗流不止一遇寒冷臂指拘攣不能張弓毫無技藝不耐勞苦者或經朕調來引見或經朕行幸時查出必重加懲治責革照違旨例治罪斷不寬宥彼時莫怨朕不預先曉諭也如有學而不能者准其告退將此通行八旗併各省駐防武職大臣侍衛官員等知之

又奉

上諭據浙江總督李衛奏稱乍浦新立水師兵丁所領錢糧已蒙恩諭照天津例每月加賞五錢衆兵莫不感戴歡呼但此兵丁內有綠旗兵四百名雖屬水師同營而滿漢攸分前次蒙恩賞賜生息銀兩未敢派令均沾今恩賞加給餉銀亦仍照舊額支放未敢添給但查此項兵丁皆須養贍家口之資其中如捕盜舵工阿班斗掟繚手等人皆自幼練習方能精熟將來滿兵即於水務極嫻而若輩仍須留用是其勤勞艱難之情非別營水

師可比可否仰請聖恩將每月加銀五錢之處一體支領并將恩賞生息銀兩亦量為分派謹此請旨等語朕覽李衛所奏甚是綠旗兵丁既派滿營教習操練自應與滿洲兵丁一體加恩况其中捕盜舵工等人尤屬効力勤勞應當體恤著照李衛所請每月一體加賞餉銀五錢其所頒生息銀兩亦酌量分派俾得同沾恩賜

又奉

上諭據署兩江總督史貽直參奏永豐署守備霍瑞把總

蕭龍縱兵不法一案稱永豐縣知縣沈儼因公赴鄉以  
銜署逼近西城城垣坍塌關會營汎撥兵防護夜間家  
人蔣谷同銜役赴城查點兵役而營兵楊茂等以不應  
向伊查問出言詈罵即行毒毆又率衆打開宅門擊碎  
公座硯筒及沈儼赴訴霍瑞營兵楊茂統衆圍繞猖獗  
辱罵打碎乘轎請將霍瑞蕭龍革職沈儼解任質審等  
語從來地方文武不和多由小事而起上司官少有偏  
徇遂激成大釁知縣沈儼但稱關會營汎撥兵防護其

關會何員之處並未聲明且衙署在城中何用動撥汎兵而云關會營汎至防護兵役豈知縣家人衙役所當查點永豐豈無佐貳可委巡查乎乃沈儼令家人蔣谷等點查兵役以致楊茂等謂不應查問兩相角口致有打鬧衙署圍辱縣官之事是兵丁之縱肆不法武弁之不能約束罪無可逭而起釁之家人蔣谷亦所當嚴究者也著將霍瑞蕭龍革職沈儼解任該署督史貽直選委賢能大員秉公審究務將起釁原由查出毋少隱匿

偏徇近來廣東文武不相和睦其間隙之生本於微嫌而上司不能秉公持正文官偏庇州縣武職袒護弁員以致漸成水火此風斷不可長今審擬霍瑞等一案若承委之員稍有未公或偏於文職朕倘有所聞另派欽差往彼審理審出徇庇情弊定將該督撫與委員一併議處

初六日奉

上諭舊例武弁給與親丁名糧以為養贍僕從家口之需

前朕聞得弁員等離任之時即將隨丁名糧召募補足而接任之員陸續候缺每至經年數載之久不得養贍之資甚為艱窘已特降諭旨嗣後武弁去任者將所有名糧不必募補留此與接任之員俾其得霑餘潤此無非體恤武弁之貧寒給與養廉以免扣尅虛冒苦累兵丁之弊也近聞武弁等若有陞遷事故者於該員離任之日即將隨丁名糧按數開除其住支銀米歸作截曠項下彙報充餉俟新任之員到日方許申報起支朕恩

署事之員不無往來車馬食用之費且各營署事多係  
部發候補試用之人並無俸薪等項應為籌畫養贍之  
道嗣後武弁去任之時其親丁名糧照舊存留不必歸  
入截曠項下其署事之員若係候補試用者准其全行  
支給以作養廉若係現任之員兼理者准其支給一半  
將一半留在本營以為修葺衙署添補器用之費即交  
該營守備存貯如有動用之處每季造具文冊申報該  
上司查核著各直省一體遵行其出征弁員及署事之

員俱仍遵前旨行

初七日奉

上諭虞書曰明四目達四聰先儒註曰廣四方之視聽以  
決天下之壅蔽也蓋天下之患莫大於耳目銅蔽民情  
物理不能上聞則雖有勵精圖治之心而措置未必合  
宜究難成一道同風之盛是以各省督撫大臣於本章  
之外有具摺之例蓋國家之事有不便宣露於本章者  
亦有本章所不能備悉者亦有應用密奏請旨者是奏

摺之用乃慎密周詳之意朕又以督撫一人之耳目有  
限各省之事豈無督撫所不及知或督撫所不肯言者  
於是又有准提鎮藩臬具摺奏事之旨即道員武弁等  
亦間有之此無非公聽並觀之意欲周知外間之情形  
耳並非以奏摺代本章凡摺中所奏之事即屬可行之  
事也是以奏摺進呈時朕見其確然可行者即批發該  
部施行若介在疑似之間則交與廷臣查議亦有督撫  
所奏而批令具本者亦有藩臬等所奏而批令轉詳督

撫者亦有聽其言雖是而不能必其奉行之無弊則批令實心勉勵還朕一是字者凡為督撫者奉到硃批之後如欲見諸施行自應另行具本或咨部定奪為藩臬者則應詳明督撫俟督撫具題或咨部之後而後見諸施行若但以曾經摺奏遂藉口已經得旨而毅然行之則如錢糧之間銷官員之舉劾以及苗疆之軍務地方之工程諸如此類督撫皆得侵六部之權藩臬皆得掣督撫之肘矣行之日久必滋弊端為害甚鉅不可不防

其漸也且各省文武官員之奏摺一日之間嘗至二三十件或多至五六十件不等皆朕親自覽閱批發從無留滯無一人贊襄於左右不但宮中無檔案可查亦並無專司其事之人如部中之有司員筆帖式書吏多人掌管冊籍繙閱規條稽查原委也朕不過據一時之見隨到隨批大抵其中教誨之旨居多令於教誨之處則未見敬謹遵奉而於未曾允行之事件則以曾奏過三字含糊藉口以圖自便有是理乎况朕曾降旨凡摺中

批諭之處不准引入本章以開挾制部臣之漸如此則奏摺之不可據為定案又何待言乎著將此曉諭各省奏摺諸臣知之若督撫提鎮等以此愚弄屬員擅作威福准屬員據實揭報或該部或都察院即行奏聞若屬員等以此挾制上司肆志妄行著該督撫提鎮等即據實參奏

又

諭都察院凡國家之事須實心辦理公同商酌務期妥協

若以衙門人衆互相推諉即稍有識見者亦皆退縮不  
前此等因循怠忽之風斷不可長爾都察院衙門堂官  
及御史等如許多人所交事件理應同心辦理如堂官  
有不到之處爾等御史亦當共相協助何得視為膜外  
今設立巡檢一疏內稱設立巡檢原以助兵馬司耳目  
之所不及該舖內一應盜逃以及黃銅賭博宰牛鬪毆  
打降酗酒等項應令該巡檢協理稽查不得專擅以侵  
司坊官之職守凡遇有地方應報事件當令該巡檢一

面申報該城御史仍一面報明該司坊官庶不致生事滋擾等語夫既令其稽查又止許其報明不得擅專倘或地方有不法等事必待報明然後拘拿遇盜賊則盜賊已逃遇賭博則賭博已散遇酗酒則醉者已醒雖三尺之童亦知其斷不可行者爾等獨無一人計及此乎且設一官必有一官之職若止許其報明則與番捕無異何必設此巡檢如恐其生事滋擾則當議令一面拘拿一面詳報不許擅自審理倘有不應拘拿之人牽連

被累該城御史審明之日將該巡檢叅處方為妥協爾等俱係言官凡一應事件皆當直言無隱乃本衙門應辦之事並不實心辦理以致遲延數月仍復草率糊塗所議甚屬不合著將原本擲還另行詳悉妥議具奏其都察院堂官及御史等一併交部察議

初八日奉

上諭各省文武諸臣奏摺經朕硃筆批示者俱令呈繳以備稽查但向來未定呈繳之期以致各員遲早不一有

二三月後乘便恭繳者有於年底彙齊呈繳者夫既奉  
硃批查辦此事下次查辦具奏之時即應將硃批原摺  
呈繳以備朕之檢閱若具奏此事而仍留硃批原摺於  
外則朕處無檔案可稽且朕日理萬機於各案之原委  
豈能一一詳記不見原批之摺未免難於辦理諸臣中  
如嵇曾筠石雲倬等數人往往如此著通行曉諭凡接  
到硃批者仍照舊乘便恭繳不必專遣人來若具奏此  
事應將原批一併呈進勿待數月之後如所抽查辦之

事尚未就緒准將硃批存留俟辦理具奏之時一同呈繳

初十日奉

上諭國家効忠宣力之臣勲績茂著必膺崇報之典令其世享烝嘗雍正二年朕已勅建昭忠寺自開國以來致命立功盡忠報國之儔皆得春秋妥侑世世血食顧念古者大烝之祭凡法施於民以勞定國者皆得並列祀典永受明禋則我朝名臣良弼其經邦佐治黼黻昇平

者皆祭法所必登朕欲為之建立祠宇久矣即如怡親王之精白一心忠誠體國勲在

社稷澤被生民其功德隆盛又豈一切効忠宣力者之所可

比倫乎洪惟

太祖

太宗創業垂統厥有一德佐命之良

世祖撫綏萬邦實多奮庸熙載之彥迨我

聖祖臨御六十餘年其間良臣碩輔後先相望據朕所深知

者舉其一二如大學士公圖海公賴塔大學士張英尚書顧八代馬爾漢趙申喬河道總督靳輔齊蘇勒總督楊宗仁巡撫陳璣等持躬正直奉職公忠或垂節鉞之勲或勵冰霜之節俯仰無愧為朝野所共欽始終不渝無瑕疵之可指似此等靖共爾位不愧古大臣之風者正不乏人既樹羽儀於一世宜隆俎豆於千秋且使世世為臣者觀感奮發知所慕效羣以臯夔稷契共相期待則明良喜起之盛朕於斯有厚望焉著於京城內白

馬關帝廟之旁選擇吉地特建廟宇命名賢良祠春秋以時展祀其應入祠之員著內閣會同該部確查本朝滿漢文武大臣才德著聞完名全節者詳慎開列具奏請旨將來繼起之臣亦併得沾被恩光永為盛典

十一日奉

上諭據四川巡撫憲德奏打箭爐口外需用糧米成都新繁等州縣士民情願不領夫價輸力挽運丹稜溫江等州縣士民情願捐米運赴不動倉穀自輸力役等語士

民等急公輸輓甚屬可嘉著該撫宣旨獎諭其應領夫  
價仍著照數給領已捐之米將存倉米石給還

又議政王大臣等議奏學士僧格貝子頗羅鼐所領  
巡防兵應令於降雪後撤回俟明歲進兵時仍往騰  
格里諾爾駐扎奉

上諭今年大兵既停進發著行文與僧格等令伊等酌量  
於未降雪之前撤回明年著僧格仍舊帶往其綠旗官  
兵照今年賞給之例賞給再發銀一萬兩著頗羅鼐明

年酌量賞給唐古忒等之兵

十二日奉

上諭據河道總督嵇曾筠奏稱六月二十六七等日風雨連綿晝夜不止東省蒙陰沂州郯費滕嶧各地方山水暴發直注邳州上接微山昭陽諸湖之水溢入黃運兩河奔騰南注等語覽奏甚為駭愕今年春夏之交北方雨澤畧少朕即慮夏秋之間雨水必多屢諭河臣加謹保護工程以防伏秋之汛今觀湖河漲溢情形有非人

力所能捍禦者朕惟有修省戒懼以凜

上天示儆之深恩更念邳州宿遷桃源等處水勢驟長禾稼  
室廬必遭淹沒深可憫惻著差往江南清查錢糧之侍  
郎馬爾泰彭維新御史安修德等星赴被水地方動支  
藩庫銀數萬兩速行賑濟其應行帶往散賑之員著馬  
爾泰等遴選廉幹者帶往分派各處會同地方官悉心  
辦理勿稍稽遲勿令遺漏務使窮民人人安堵寧居咸  
得其所其被災之處今年額徵錢糧著悉行蠲免儻有

已經完納者准作明年額徵之數聞山東發水之處民間田舍亦被損傷著巡撫岳濬遴選賢能官員前往查勘動支庫銀速行賑濟勿使一夫失所其應行蠲免錢糧之處著一併確查奏聞請旨

又河東總督田文鏡叅奏河南管河道施克施海挾私誤工協理北河總督范時繹局外坐視請嚴審究擬奉

上諭施克施海以筆帖式徵員用為河南南岸同知經田

文鏡嵇曾筠等大計特薦來京引見朕看其人甚屬平常但因伊等合詞薦舉料其必有所見於是准其卓異旋陞戶部員外郎因其熟諳河工仍以陞銜管河工同知事務繼又報丁母憂嵇曾筠以該員人材強幹河務熟嫻題請在任守制今年春夏之間朕因嵇曾筠曾摺奏拖克拖海可勝充寧道之任後見田文鏡將王鴻勲題補充寧道降旨詢問田文鏡據田文鏡奏稱王鴻勲宜於充寧道之缺拖克拖海在豫日久熟練河工若用為

河道實為駕輕就熟於是與嵇曾筠會題請將伊補授河南管河道朕降旨俞允以此等微末不堪之員數年之內屢膺薦舉受朕深恩格外超遷至觀察大員之職施克施海苟有人心宜何如感激奮勉急公趨事以圖報稱乃當河工伏汎危險之時而伊視本身職掌如同局外顯因田文鏡未曾將伊題補充寧道蓄憾於心又見差委朱藻到工監督中懷嫉妒以為功過成敗與已無涉似此挾私廢公背恩藐法將上司屢次薦舉之德

一槩遺忘尚得謂之有心者乎范時繹乃一旗員朕  
念其為勲臣之後加恩擢用諄諄訓誨望其克紹家聲  
乃伊在江南總督任內玩愒廢弛因循苟且無一察吏  
安民詰姦禁暴之善政如江南之有名鹽梟巨盜皆朕  
訪確姓名諭令查拿而伊始遣人往捕又如大盜趙七  
暗結黨羽盤踞江湖肆行刦奪擾害良民范時繹身在  
地方若罔聞知朕密旨諭令設法擒緝而范時繹視為  
泛常明目張膽通行文書於江西湖廣等省以致渠魁

聞風遠遁范時繹止擒獲其母具摺奏聞不思此等凶惡之徒豈尚有母子之情而范時繹遽欲以此卸除盜安民之責乎且其居心行事詐偽不誠巧令朱弘緒在朕前奏其操守廉潔至於日食不敷朕聞之惻然動念急令江南江西巡撫等為伊籌畫養廉之道及查明之後始知伊於應得之項原係收受並不至於艱窘而朕猶欲俾其用度寬餘仍令加增以與之無非成就其操守使之專心殲力於封疆也乃江浙地方潛藏匪類生

事不法蠱惑人心朕令李衛悉心查拿李衛果恪遵辦  
理又密諭范時繹若浙江文到江南查緝人犯務必慎  
密拿解勿使漏網豈料范時繹袒護私交縱容匪類竟  
有與馬世珩通同作弊之事各犯供據鑿鑿不能掩飾  
朕猶密諭李衛於審訊定案之時留意保全勿使罹於  
重罪蓋猶諒其無交結逆黨之心不過瞻徇情面之所  
致且范氏一門現今為大員者止范時繹范時捷兩人  
耳勲臣後裔漸致零落朕心不忍所以委曲成全之者

至矣范時繹到京朕仍不肯令其罷斥廢棄特命料理太平峪吉地工程以為効力自新之路適因北河總督不得其人於是命伊前往膺茲重任伊出京之時朕面加訓勉伊亦自陳感恩悔過願圖後效情詞懇切比時朕批諭田文鏡曰范時繹此任若不奮勉以贖前愆則非人類矣大槩此任似屬相宜田文鏡回奏亦稱恩命范時繹前來交相贊助臣益得協同斟酌可免竭蹶及范時繹到豫之後田文鏡又奏稱臣看范時繹誠心感

戴聖恩且於事務亦甚練達必能實心報効臣得此相助為理之人深為欣幸等語豈料范時繹下愚不移以本身專司之務又當伏汎危急之時田文鏡所委各員俱上緊搶護而范時繹與施克拖海袖手旁觀竟同陌路視國事如弁髦視民命為草芥此等負恩溺職之愆在他人尚且不可況在范時繹之身乎實令人斷斷不信有此事也施克拖海著革職即於河工險要地方永遠枷號示衆范時繹亦著革職將一切工程交伊加謹

防護俟秋汛過後拿送來京將伊從前所犯罪案悉行  
查出從重定擬具奏倘今年秋汛防護不謹少有疎虞  
即將范時繹施克施海請肯在貽誤工程之處正法凡  
人貪得求進之心無有止足而又不自知其分量受恩  
而永遠知感者少稍不滿意而心懷怨望者多是以上  
司待屬員之難亦如人君之待臣工也當其未用之前  
則思進用既進用矣又思邀君心之信任既信任矣又  
或以不及某某為憾即如舉劾之間若諸臣意見合同

人君亦何憚而不從之無奈彼此所言互異不得不斟酌審量以定去取而其言不行者遂以此快快於心似此懷庸鄙之見者正不少也屬員之於上司始初被薦之時亦知感激及遲至一二年後州縣則以不得題陞府道為憾矣府道又以不得題陞兩司為憾矣偶見同列遷官即起妬嫉之念或見他人信用即生退縮之心如施克施海今日之事小人之情狀畢露矣不得不嚴加懲治以挽頽風而祛惡習著通行直省共知之

十九日總理水利營田事務大學士朱軾等奏交河  
縣所屬隄工水勢漫溢請將在工人員交部議處奉  
上諭今年六月間直隸地方雨澤頗調並非多雨之歲而  
北河堤工水勢漫溢若此總之吾弟怡賢親王仙逝遂  
至籌畫多疎防護鮮術朕雖宵旰焦勞而辦理無人將  
奈之何今歲六月雨不覺多尚然如此目下秋雨稍覺  
連綿又不知如何漲溢也假如雍正三年五年之積雨  
洪流又將奈何河工關係國計民生最為緊要朕心深

切厪念其作何善後之計著詢問九卿具奏恭鵠立自  
差委以來因病尚未任事何國宗另有辦理工程著免  
其議處朱軾不能彈壓屬員使之殫力盡心著交部察  
議其專管分轄統轄各員著交部嚴察議奏至漫溢一  
帶地方禾稼室廬必遭水患著該督遴選賢員星速查  
勘動用公帑加意賑恤勿使稍有失所其被水應免錢  
糧之處著確查奏報候旨蠲免

二十五日奉

上諭前聞北河水勢漫溢總因吾弟怡賢親王仙逝經理無人防範鮮術以致如此已將該管各員交部議處並詢問九卿作何善後之策深慮近水居民遭值水患或至失所已飭令該督加意撫綏茲據唐執玉奏報順德府屬之平鄉任縣鉅鹿沙河南和五縣廣平府屬之永年雞澤邯鄲肥鄉曲周磁州六州縣大名府屬之南樂魏縣大名清豐四縣趙州屬之寧晉隆平二縣河間府屬之吳橋東光二縣田禾廬舍俱被水淹又聞清河交

河青縣冀州衡水元城東安永清武清等縣亦有被淹  
之處甚為軫念雖地方有司已遵旨查勘賑恤惟恐或  
有怠忽稽遲未能深體朕心者著派出侍郎副都統京  
堂科道等分為四路攜帶帑銀速行前往會同地方官  
確查賑濟務將被水窮民登之衽席若有動用倉穀之  
處將本地倉穀即行動用一面奏聞其應免錢糧之處  
即曉諭停徵將應免分數確查奏報候旨蠲免

又署福建水師提督許良彬奏請停卹賞兵丁之例

以杜冒濫奉

上諭此項賞賚之典乃朕軒念遭風受困之弁兵特加恩澤該管之大臣等惟有確查明白不令所屬假捏虛報斯為盡職豈有因冒濫之弊易生遂行停止之理許良彬此奏不合著飭行

二十六日奉

上諭朕聞常賚回京路過西安府該省督撫二人及副都統四人率同文武等官奏請朕安乃於齊集之處副都

統陸寶陳良棟等興巡撫爭論班次大失體統朕思同  
為滿洲大臣共事一方自應倍加和協彼此敬禮以為  
官弁兵民之表率况請安闢係大禮而乃於大廷廣衆  
之前互相爭競俾遠近傳為笑談深可愧恥此番若係  
巡撫倡論在先朕自將巡撫議處今聞爭論之端起於  
副都統等則其過不在巡撫矣大約武臣平日以文臣  
缺於周旋或有應付不到之處懷怨於心是以假公濟  
私加文臣以無禮而不顧大臣之體此風斷不可長西

安副都統四人必有一人首先倡議者著文興總督查郎  
阿務將何人倡議何人附和之處一一查明具奏無得  
稍為徇隱其倡議之人交部嚴加議處附和之人交部  
議處若查郎阿不能據實查明朕即將副都統四人俱  
調來京另派大臣審訊嗣後西安一應會集之處巡撫  
班次著在副都統之上永遠遵行該省巡撫副都統等  
若因此番爭論之故文臣或有脅制武臣之意武臣或  
有怨忿文臣之心別尋事端暗生嫌隙經朕訪聞必究

問根由將理屈之人從重治罪大凡文武不和皆起於私心蔽錮若公則未有不和者朕之訓誠至詳且悉同為國家之臣同辨國家之事不能遵朕訓旨共矢和衷祇因一念之私遂至懷挾猜疑各立門戶置國家公事於不問有是理乎向後各省儻再有文武不和者朕定將文武官一并調取來京嚴加究訊從重懲治以為人臣因私廢公者之戒

二十七日奉

上諭前據總河嵇曾筠奏報南河水溢情形知山東地方  
有發水被淹之州縣已諭令該撫率同有司就近加意  
賑恤茲據河東總督田文鏡奏稱兗州濟南東昌青州  
曹州東平泰安營州各府州屬於六月二十一至二十  
六七等日風雨交作山水陡發河流驟長其傍山臨河  
處所及窪下之地田禾室廬被水淹浸查雍正三年東  
省被水仰蒙特頒諭旨將田地被淹房屋倒塌之窮民  
悉加恩賜今年被水之民可否動用存倉穀石大口每

月給穀三斗小口每月給穀一斗五升各給兩月口糧  
其房屋倒塌無力修理者於藩庫存公銀兩內每戶酌  
給銀一兩五錢以為葺屋之費等語覽奏朕心深為軫  
念著照該督所請轉飭司道府等官仰體朕心按戶速行  
散賑務令均沾恩澤其無力修理房屋者著賞給銀兩  
速令修葺俾得安堵樓身勿使一夫失所至於賞給口  
糧著於兩月之外增添一月其應免錢糧之處即曉諭  
停徵著該督撫將如何蠲免之處確查定議奏聞請旨

二十八日奉

上諭據巡察順天永平宣化等處給事中海明奏稱宣化府之西寧蔚州懷安等處夏秋缺雨禾稼歉收西寧縣被災六分至九分不等民人艱窘欲往口外就食總兵官李如柏則稱應聽其出口不必阻攔口北道王棠則稱已於近口州縣設法留養不令遠去現令督臣來文令動常平社倉之穀二千餘石以濟民食似不敷用等語西寧等處歉收情形該督並未詳悉奏聞今覽海明

所奏知該地方官員辦理安插之處俱未妥協若照例  
交興該督等則保定道路迂遠轉致稽遲著派出副都  
統韓光基給事中羅鳳彩星速前往西寧等處悉心查  
勘將乏食窮民加意撫綏無令遷移失所其作何散賑  
平糶之處即會同口北道動用地方倉穀一面辦理一  
面奏聞若有應用銀兩之處即於張家口同知衙門存  
庫銀兩動支給發

世宗憲皇帝上諭內閣卷九十六

欽定四庫全書

世宗憲皇帝上諭內閣卷九十七

雍正八年八月

上諭十八道

初三日奉

上諭前聞直隸地方有被水之州縣朕心軫念已星遣侍郎副都統等分路前往蠲賑兼施茲據署督唐執玉奏稱各屬被水情形消長不一有上諭所及之處而水勢

實已消落可免成災者亦有上諭未及之處而田廬被  
災急須拯卹者伏乞勅諭查賑諸臣據實踏勘通融辦  
理則窮民均沾恩澤等語著即行文與牧可登阿魯佛  
保趙弘濟等照該督所請悉心查勘核實通融朕前諭  
未及之處有應行賑濟者即交興附近差往之大臣官  
員等速行料理務令得所以慰朕拯卹災黎之意

又奉

上諭昨據河東總督田文鏡奏報山東被水各州縣朕已

降旨諭令該督撫轉飭司道地方官動支銀穀加意賑恤茲聞萊州府屬之昌邑壽光濰縣青州府屬之益都沂水博興高苑臨朐濟南府屬之鄒平等縣俱被水患民舍田禾不無傷損著該督撫遴委賢員星速查勘應否與從前所報州縣一體加恩之處著一面辦理一面奏聞倘再有續報被水之處亦著該督撫遵照前旨速行料理無使稽遲

初七日奉

上諭廣東地方山海交錯民猺雜處盜賊易於潛踪所恃以防範者則有在安設之塘汎星羅棋布絡繹聲援無事則相為守望一遇盜賊則協力擒拏勿使遁逸其水汎與陸汎不相比附者則應各自管轄巡防若陸汎設於江邊雖無舟楫亦當與水汎為犄角之勢此設立防汛之本意也朕聞廣東防汛兵弁甚屬廢弛即如今年四月間有韶州府人陳宏德等在佛山鎮糴菜子歸家舟過三水縣太監沙汎被盜十數人持械逼船刮物

殺人事主船戶竭力喊叫並無汎兵救護及賊衆去後  
亦不追拿其失事之處則緊貼汎地似此怠玩成風視  
同秦越則設立汎兵有何裨益彼河南浙江之防汎整  
齊嚴肅衆人皆知豈廣東之文武大臣獨不知之乎清  
夜自思能無汗愧著該提鎮嚴行稽查整飭儻再有似  
此推諉怠忽者即將該營弁員題參兵丁從重治罪若  
該提鎮有心徇隱或失於覺察經朕訪聞定行嚴加議  
處

初八日奉

上諭據署直督唐執玉會同差往散賑之侍郎副都統等奏稱被水州縣輕重不同其村莊之多寡亦不一臣等欽遵諭旨賑濟三箇月議得大口日給高粱四合小口日給高粱二合照本地時價折銀給發等語賑濟之例所給人口米粟多寡雖無一定但大口祇給高粱四合小口二合而又折以時價其為數甚微恐不足以賑恤災民查現今賑濟州縣該督奏報冊內俱有留漕改穀

及存貯捐穀多者二三萬石少者亦數千斛何以不將此項穀石動用著該部即行文唐執玉及差往賑濟之牧可登阿魯佛保趙弘濟等照被水村莊之戶口大口每日或給高粱七合或給粟米七合小口每日或給高粱四合或給粟米四合如未碾之穀加倍給發儻存倉糧穀或不敷用大口每日給銀一分小口每日給銀六釐令其自行糴買此項粱米銀兩以三個月通計給發務使災民均沾實惠各令得所該署督等即遵諭行

初九日戶部議奏京畿有莊屯之地應分為八路設官辦理奉

上諭依議旗莊等處設立官員乃立法之始必得賢能之人實心辦理訓導有方始有益於人心風俗茲所差往之員著該管大臣於所屬內揀選保舉差往之後仍著保舉之大臣留心訪察倘差往之員或不能稱職或在地方生事而保舉之大臣據實參奏者免其誤保之處分若不行參奏經朕訪聞發覺者將保舉之大臣一併

嚴加議處

初十日奉

上諭向來蠲免錢糧額徵漕米不在所蠲之內朕思京通各倉米粟年采悉心經理已有餘積又有直隸營田所產稻米可以採買貯倉是京通倉儲有日增之勢今年山東地方被水稍重而直隸江南河南三省亦間有被水之州縣夫地方既已歉收則漕米輸將未免竭蹶著將山東被水州縣之漕糧全行蠲免直隸江南河南被

水州縣之漕糧按成災之分數蠲免其山東未被水州  
縣應完之漕糧不必運送京師即留於東省以充兵餉  
如此則各該地方皆有多餘之米糧於民生大有裨益  
著直隸河南山東江南督撫遵照諭旨分別速行辦理  
務令妥協俾閭閻均霑實惠以副朕格外加恩之至意  
十三日奉

上諭據甘肅巡撫許容奏稱遵旨於河源相近之區相度  
吉地建立廟宇奉祀河源之

神旋據河州文武官員報稱六月十五日午時有慶雲捧  
日之瑞又據臨洮道劉柏等詳報七月初五日至積石  
關選擇廟基見河流澄湛徹底泝流查看共計一百餘  
里俱各澄清凡歷三晝夜官民共覩等語朕從來不言  
祥瑞年來各省奏報慶雲醴泉鳳凰芝草之屬悉皆屏  
却惟務君臣士庶修德行義以承

天眷屢頒諭旨詳矣今年春降旨於河州口外地方恭建廟

宇以答

河神福國佑民之賜而彼地河流即昭上瑞顯著休徵益見天人感應之理捷如影響惟懇求不以其道或以已事或出私心則不但不能感通且上干

明神之怒若以公心為昭事之本必蒙

上天垂鑒而默佑之觀河州立廟之地即有河流瑩澈之祥此乃

上天以居高聽卑之道顯示我君臣士庶者朕不勝感激欣慰之至惟有益加勉勵夙夜敬謹以受

天恩

十五日奉

上諭吾弟怡賢親王之事朕躬至誠至敬翊贊助襄裨益

於

宗

社國家民生吏治者功勲懋著自古罕有比倫而其忠愛朕躬之心肫誠篤摯出於至性更有非言詞稱述所能宣者朕即加恩沛澤於常格之外究不能展朕崇德酬庸

寤寐追思之念也吾弟之子弘曉著襲封怡親王世世  
相承永遠弗替凡朕加於吾弟之恩典後代子孫不可  
任意稍減佐領屬下等項亦不可那移更改一二再者  
朕於雍正三年春以怡賢親王總理事務恪恭抒盡夙  
夜勤勞曾降諭旨於王諸子之中再封一郡王以昭恩  
獎比時王再四懇辭情詞諄切朕不得已勉從所請成  
其謙讓之美今吾弟仙逝朕追想遺徽中心輾轉在賢  
王有必應加之禮在朕衷有實難已之情雖與吾弟素

願相違朕亦不遑顧惜弘曄著封為郡王世襲罔替所  
有襲封親王冊封郡王應行典禮該部察例具奏

十七日奉

上諭從前朕以武弁一年所得俸薪不敷所用令自提鎮  
以至千把總俱量給親丁名糧以資養贍今各省添設  
外委千把尚未議及念此外委人員所辦者千把總之  
事而所食者仍止本身一分馬糧一應公差紙筆衣馬  
之費實有不敷著將各省外委千把總每員給與步糧

一分即令伊之子弟家人頂食以資養廉倘有仍借辦公名色扣尅兵餉滋擾地方者著該管官即行揭報該轄大員即行指參母得姑徇寬縱

又奉

上諭據湖廣總督邁柱奏稱沔陽州錢糧自康熙五十五年至雍正四年內除康熙五十九年通完無欠外共計十年積欠銀八萬九千二百餘兩里民一聞清查爭先完納今已完銀二萬二十四十餘兩又查出官侵銀二

千六百八十兩役蝕銀二萬六百七十餘兩衿棍包攬  
銀八千六百八十餘兩實在民欠尚有三萬五千一百  
三十餘兩其官侵役蝕包攬內除原任知州盧振先等  
藉報災使費名色派徵一案已特疏題叅其餘皆係自  
行首報仰請暫緩究治一年追究如逾限不完照例治  
罪其實在民欠三萬餘兩仰懇與以一年之限分作三  
限徵收則民力寬紓等語朕之降旨清查積欠者原以  
地方貪官污吏及不法衿棍借民欠之名恣意侵蝕蠹

國累民為害甚鉅不得不清釐懲治以儆將來今於汚  
陽州逋賦之內果查出侵蝕包攬銀三萬餘兩而里民  
一聞清查即爭先完納可見民心本屬善良而從前之  
間有拖欠者則官吏衿棍導之為非又或因該州近水  
常有澇溢之事力量未免不敷並非有心頑抗輕視國  
課也其現在未完之民欠三萬餘兩朕意欲開恩酌量  
豁免俟該督撫造具清冊到日再降諭旨今著停止  
催徵並將此旨出示曉諭百姓知之其侵蝕包攬之項

著照邁柱所請寬限一年令其完納如逾限不完照例治罪

十八日和碩莊親王允祿等奏賀河清奉

上諭王大臣等以河州地方黃河澄清合詞奏賀朕從來不言祥瑞諒王大臣等久已深知朕心朕之祇事

上帝神明惟以公誠一念為昭格之本果蒙

上天垂鑒頻年顯示嘉祥觀公誠之感通神捷如此則懷不公不誠之心者豈能逃於

上天之譴責乎朕心不但不敢矜誇且因此倍加乾惕更願  
天下臣工士庶各矢公誠之念以受

上天之恩著照王大臣等所請宣付史館俾世世子孫臣民  
恪遵朕訓以綿福澤

十九日奉

上諭據馬爾泰等奏稱邳州等處被水民人已派委多員  
會同地方官查勘賑濟大口每月給口糧一斗小口每  
月六升擬給兩個月其房屋倒塌之人給價安頓等語

凡此被水窮民朕心深為軫念馬爾泰等所定口糧之數忍有不敷大口每月著給米一斗五升小口照大口減半深冬寒冷之時尤宜賑恤著於兩月之外加增一個月應於何時給發著馬爾泰等會同尹繼善悉心籌畫辦理奏聞務令小民得所

又奉

上諭今日地震八旗兵丁房屋牆垣必有坍塌者朕心深為軫念每旗著各賞銀三萬兩滿洲旗分人多蒙古漢

軍旗分人少此所賞銀兩不可拘定旗分著該都統等按各佐領人數均勻分給務令共沾實惠圓明園八旗兵丁每旗著各賞銀一千兩以為修葺屋宇之用

二十日奉

上諭昨午地震兵民房舍牆垣必有頽塌者八旗兵丁已降諭旨每旗賞銀三萬兩令該旗大臣按名分給其內外城居民每城著派出滿漢御史各一員分查民間房舍或有屋宇倒塌者或有牆垣頽缺者作速據實清查

分別具奏朕將加恩賞給該御史等務悉心秉公辦理  
儻有吏役隱匿虛冒扣尅等弊經朕訪聞將吏役從重  
治罪該御史嚴加議處

二十一日奉

上諭據河道總督嵇曾筠等奏稱黃運兩河水勢消落其  
湍急諸處竭力修築於八月初八初十十三等日俱已  
合龍告竣所有上下中河間段殘缺堤工現在修補回  
空漕船毫無遲悞其高堰大堤因今年奉旨發帑幫築

是以湖水雖大足資捍禦幸保無虞兩岸居民依然安堵父老僉稱今秋水勢甚大而旋即沙淤掛口從未有如此神速等語朕前聞湖河水勢漲溢附近地方罹於水患宵旰憂慮不釋於懷發帑遣官星馳賑恤兼命河臣等極力堵築務期早慶安瀾今水勢消落迅速計日施工即能底績此皆

神明默鑒朕衷俯垂護佑故化險為平奏功若此之速也

朕心深為感激著照上年之例敬謹致祭南河北河之

神以申報享之典應行禮儀著該部查明具奏所有疎防  
大小官員著免其查叅其修復各堤錢糧亦免分賠

二十二日奉

上諭八月十九日地震朕即差員分為五路於京師附近  
地方察看情形今據各員奏稱京東京南及東南東北  
四路地覺微動房屋並未坍塌人口俱各平安惟京之  
西北沙河昌平及西山相近村莊房屋倒塌甚多人口  
亦有損傷等語朕心深為軫念著派出鴻臚寺少卿顧

祖鎮內務府郎中鄂善戶部郎中阿蘭泰帶內庫銀二萬兩速行前往會同地方官逐戶挨查房屋坍塌者給與修理之費人口傷損者加恩賑卹毋致遺漏倘所帶銀兩或有不敷著該員等即行奏請再給

二十六日奉

上諭數年以來遵化州

陵寢附近之地方雨暘時若年穀順成今年春月畿輔微覺亢旱而遵化等處則雨澤調勻民人樂業六月日食之

期

陵寢地方則陰雨不見本月十九日京師地動朕繫念  
山陵憂勞寤寐星遣侍衛等馳往看視今據差四人員及守  
護

陵寢之王大臣等奏稱十九日地覺微動較他處更輕村舍  
牆垣悉皆無恙居民竟有未經知覺者朕以手加額五  
內歡欣益見我

皇考之聖德神功際天蟠地受眷佑於

上帝貽福慶於蒼生若此之彰明較著也朕感

上帝之慈恩念

皇考之功德特將近事之顯而可見者曉諭諸王大臣九卿

等共知之

三十日奉

上諭京師於八月十九日地震朕恐懼修省感激

上天垂象示儆之恩倍切乾惕今年各直省收成頗好而其中間有被水澇溢之處該省督撫大臣往往引過自責

朕即批示並宣諭左右大臣曰此非臣工之咎其過實  
在朕躬蓋今年春夏以來朕體中違和仰惟

宗

社仗關

列祖

皇考付託之重不敢不保護此身是以屏除思慮葆靜頤養  
而勤政敬事之心實不及平時又因吾弟怡賢親王仙  
逝朕心悲痛有傷

天和遂致水澇情形見於數省朕深知其由不肯卸責於臣工而為大臣者但當撫躬自問或有干涉招致之處則默加省察以漂

天戒不在別過之虛文此朕從前曉諭臣工者目今又有地震之異實因朕躬違和不能勤敬如前仰蒙

上天垂憲顯示儆戒惟有夙夜祗懼切加省改以戴

天恩除兵民人等屋宇傾圮者一一查賞外用將朕心曉諭

內外臣民共知之



卷九十七

卷九十七

世宗憲皇帝上諭內閣卷九十七

欽定四庫全書

史部

世宗憲皇帝上諭內閣卷九十八至一百三

詳校官左都御史臣李 紹

編修臣裴 謙 覆勅

總校官原任中允臣王 燕 緒

校對官原任典簿臣郭祚熾

詹錄監生臣金國禮

欽定四庫全書

世宗憲皇帝上諭內閣卷九十八

雍正八年九月

上諭十四道

初一日奉

上諭昨因京師地動凡兵民等屋宇傾圮者已降旨詳查  
賞給銀兩以為修理之費而滿漢大小官員等亦俱有  
修墻葺屋之事朕心軫念著將各部院衙門官員八旗

都統副都統統領叅領佐領驍騎校護軍校等及已上衙門之世襲官上三旗侍衛內務府官員步軍統領衙門等官巡捕三營官弁每人俱賞給半年之俸

又奉

上諭八旗兵丁等房屋傾圮者昨已每旗賞銀三萬兩為修理之用聞該管之都統官員等按戶賞給不論坍塌牆垣屋宇之多寡及有無傷損人口之處一概均勻給散以致被傷輕重之家領賞並無差等其名則均而實

則不均之甚總因該管之大臣官員等但圖已身易於辦理潦草塞責不肯以實心經理公事俾朕之恩澤不濫不偏登衆兵於衽席也除從前所賞銀兩各旗已經均給外今朕再賞每旗帑銀三萬兩著該旗大臣官員等悉心確查分別等次秉公賞給務令寒苦之家實霑恩惠倘有應賞而不賞及不應賞而賞或多寡任意不能公當者經朕訪聞必於該旗之大臣官員是問至於八旗之官弁朕已賞給半年之俸不在查賞之內

初二日奉

上諭自古為治之道在於和衷孟子曰天時不如地利地利不如人和蓋天下之事未有不和而能有成者果能和矣則天地神明尚且感格自覺呼吸可通而況於人乎然能和之道惟在於公公則必不至於不和不公則斷不能和此又一定不易之理朕所日日訓誨天下臣民而望其洗心滌慮信受奉行以共享昇平之福也文武雖屬兩途然同在一省一方之中同辦國家之事則

不但有同舟之誼實如手足臂指之同在一身也人身  
一體不適則百骸皆為之不寧此亦顯而易見者奈何  
為私欲蔽錮而任肢體之互相戕賊以貽腹心之患乎  
數年以來朕留心體察內外同事臣工頗能遵朕諭旨  
勉矢和衷之義即文武各官同在一方而各殫其職無  
爭競嫉忌之念者亦多有之此皆人心風俗之善亦該  
省文武大臣實心表率化導之功也惟有廣東一省惡  
習相沿頹風難挽文與武既分為兩黨而文與文武與

武又各分為一黨如楊文乾石禮哈常賚阿克敦官達之互相排陷仇怨相尋則皆方願瑛一人從中播弄之所致方願瑛之姦險遺害於粵省吏治人心者其罪不容於誅也至於文武彼此告訐之言不可殫述文官則言武職諸員或向知府包攬漏貌或向州縣囑託人情視為成規恬不為怪稍不如意即出謗言以勤謹辦事者為過於躁急以不徇私情者為擅作威福自恃粗豪傲慢無禮又如兵米一項地方有司給與本色而營弁

以不能折價為憾往往蓄怨於心此文員陳訴之大概也武官則言文職諸員貪鄙居心黨援不鮮恃有承審之柄藐視武途以為操縱之權可以由已且通省事務有主持掌握之人大小有司夤緣交結往往借勢欺人多畏懼武弁若拂其意即起釁端以為報復之計常有武職查拿違禁之事如賭博私牢等類而文員則置若罔聞或徇情釋放又如礦山聚衆至數千人係府縣官員之家人勾引姦徒開採希圖重利武弁遣兵驅逐

以致結怨益深今雖不用家人而姦商地棍仍領道府  
資本廣集匪類現在私開不畏國法此武弁陳訴之大  
概也年來似此等語達於朕聽者不止數處亦不止數  
人雖出於怨懟之口不足盡信然亦未必皆全無影響  
之談爾文武各員自思之膺國家簡命之榮受管轄兵  
民之寄乃以營私網利之故相傾相軋效市井無賴小  
人之所為而置人心風俗官方戎政於不問爾等不知  
自愧朕實為爾等愧之也况督撫藩臬而有袒護文官

之心則武弁必有被其屈者矣提督總兵而有袒護武  
弁之心則文員必有受其枉者矣文員而有袒護百姓  
之心則必有無辜受害之兵丁矣武弁而有袒護兵丁  
之心則必有無辜受害之百姓矣不和之故由於不公  
不公之害致使官弁兵民並受其困為臣工者尚可狃  
於故習而不猛省速改乎郝玉麟到任未久於粵東情  
形尚未深知傅泰才具平常不過謹守繩墨無整理化  
導之能王紹緒則以身為武職惟恐取怨於文員而又

不能開誠布公訓導所屬之武弁往往作不平之語指  
令屬員與文職相爭殊失大臣之體王紹緒傅泰均不  
宜廣東之任是以有調補之旨巡撫統率全省文員提  
鎮統率通省武弁至於總督則兼文武而統轄之者果  
能秉公持正無黨無偏以己身為庶官之坊表而又時  
時宣揚朕諭俾其儆戒提撕若遇屬員有爭競告訐之  
事則以理判其曲直不存文武偏向之見過小者切加  
戒飭過大者即入彈章俾強弱不得相凌是非無或倒

置如此而屬員有不革面革心嚮風率教者無是理也  
朕今再頒諭旨通行曉諭著該督撫等遵照刊刻通省  
文武大小官弁各給一道俾令朝夕觀覽改前愆而敦  
善行倘再有蹈襲故轍罔知悛悔者則是冥頑不靈自  
違越於德教之外矣國法具在本人自無所逃而文武  
大臣表率無方訓導不力有忝封疆之任負朕倚任之  
恩亦定行嚴加處分不稍寬貸觀風整俗使亦當留心  
稽察可也

初六日

上諭近因朕躬初愈諸大臣等奏請節勞朕因憶吾弟怡  
賢親王在日八年以來誠心協贊代朕辦理之處不可  
悉數從前與吾弟閒談中每常奏云聖躬關係

宗

社至為重大凡臣工可以辦理者皆當竭誠宣力以代聖躬  
之勞臣心實願將已之年齡進獻以增益聖壽朕此時  
聞之深為不悅以此言為非今日回思吾弟八年之中

輔弼勵勦夙夜匪懈未必不因勞心殫力之故傷損精神以致享年不永且即以人事論之吾弟費八年之心血朕得省八年之心血此即默默中以弟之壽算增益於朕躬矣其理易明其事甚顯此皆廷臣所不知者偶因感觸將此宣諭知之

十一日奉

上諭從前直省應行起運錢糧該省撫藩以解部為艱每至撥餉之時百計營求借備公協餉之名存留本省而

戶曹堂司亦就中漁利徇情將雜項稅課盡留司庫即正項解部者亦屬寥寥以致外省撫藩得借存庫名色通同那用而州縣效尤亦不肯隨徵隨解官侵吏蝕虧空纍纍自怡賢親王總理戶部以來與二大臣同心釐整直省一切正雜錢糧除實在存留並各封貯數十萬兩以備公用外其餘悉於春秋二季按數撥解從此各省不敢有虛收虛報之弊地方大吏亦咸知怡賢親王秉公持正之心不可以營求倖免是以虧缺漸清帑

藏充裕今怡賢親王仙逝戶部大臣仍遵守遺規未嘗  
稍易但恐不肖司官及姦猾胥吏乘間覬覦希圖撞騙  
而無知外吏或冀倖可以復行舊習稍留掩藏虧空餘  
地仍令書吏家人到京鑽營亦未可定倘有此等或經  
戶部大臣察出叅奏或朕親有訪聞定將該撫藩革職  
究擬司官書吏即行正法決不姑貸大學士等傳諭中  
外知之

十七日兵部議覆廣東巡撫傅泰奏請將民間刀鎗

馬鎧等械刊刻姓名取具鄰保互結存案應如所請  
奉

上諭此本內所議似屬紛更民間未免擾累且恐姦猾之徒私藏器械而良善之民畏懼盤查不敢存留轉無禦盜之具著郝玉麟鄂爾達王士俊各抒已見悉心酌議具奏

十八日奉

上諭朕臨御萬方宵旰勤求惟以愛養斯民為念數年以

來除租減稅疊沛恩膏不但旱潦歉收之處蠲賑兼施  
即該省年穀順成不湏減賦而朕欲使民力寬裕每加  
格外之恩蓋國家經費既敷則藏富於民俾各家給而  
人足乃朕之至願也查各省錢糧朕特降諭旨蠲免者  
已多今次第舉行應及於江西湖北湖南三省著將辛  
亥年三省額徵錢糧各蠲免四十萬兩又念直隸乃畿  
輔首善之地應沛殊恩山東今歲被水之州縣稍多朕  
心甚為軫念除二省澇溢地方已加意賑恤並將本年

額賦照例蠲免外著將辛亥年直隸山東通省錢糧各  
蠲免四十萬兩以上五省共免正賦二百萬兩各該督  
撫應仰體朕心嚴飭有司敬謹奉行務令閭閻均霑實  
惠儻奉行稍有不善或被官吏侵漁或有衿棍包攬等  
弊一經發覺必重治其罪並將大小官員嚴加議處

十九日戶部奏

太平峪民地已加倍償給旗人地畝應行旗查案奉  
上諭旗人地畝若賞給銀兩則旗人固得實惠而佃種之

人未免無地可耕不必賞給銀兩爾等再查入官地畝  
賞給使原佃種之人仍得耕種

又奉

上諭覽總督高其倬等所奏辦理太平峪吉地事宜甚屬  
妥協從前吾弟怡賢親王為吉地一事殫數十年之心  
力相度經營務期美善又得高其倬同心襄助再三審  
酌而後定此規模大凡讀書居官之人通曉堪輿者甚  
少即或知之又往往以此為諱不肯身任其事蓋其心

以堪輿為技藝之事習之不足以成名或轉為人之所輕笑耳况高其倬乃封疆之賢大臣其為國家樹績建勲為己身揚名垂譽者不可悉數已顯然在人耳目尤不必以此為宣力見長之地乃高其倬之心以為國家之事莫大於此以一身協贊怡賢親王肩此重任悉心籌度務期萬全無一毫瞻顧推諉之意此實出於一片忠愛至誠之悃不僅才識超羣已也朕之嘉獎高其倬者實在此特諭內外臣工知之高其倬著賞給一等

阿達哈哈番管志寧地理明通辦事恪謹著從優議叙  
明圖任擇善贊襄勤勞海旺保德督工敬慎一併議叙

二十一日奉

上諭今年南北兩河水勢浩大幸賴

神明垂佑得慶安瀾而兩河總督等督率河員搶護修築  
亦殫心力矣今據奏報秋汎已過各工平稳朕心甚慰  
田文鏡嵇曾筠尹繼善著交部議叙除南河疎防各員  
昨已降旨免其處分賠帑無庸議叙外其餘南北兩河

官員在工防護有功者著該總河一一查明送部分別  
議叙

又奉

上諭今年八月十九日地動朕心恐懼修省以凜  
天戒並將夏秋以來朕躬調攝不能勤敬如前以致上干  
天和引過自責曉諭天下今經一月矣地氣尚未全寧或日  
或夜尚微動一二次昨又兩次值陰雨朕軫念露處之  
民痾瘼乃身未嘗不願與之共此苦也惟是天地之災

祥皆由於人心之感召朱子曰吾之心正而天地之心亦正吾之氣順而萬物之氣亦順然則天地之心安有不正者其或有不正乃從人心之所感天地豈有降災於人之理也尚書曰作善降之百祥作不善降之百殃善惡之報如影隨形是人人有感格天地錫福降殃之理遇災而懼上下貴賤當同此心此顯而易見之理不可全諉諸人君一身而各置己身於局外也八月十九日地動之先朕無意登舟臨時全無受驚即既動之後

城內宮中及圓明園宮眷子孫長幼內外侍從數百人  
悉皆安吉豈非

上天於垂象示儆之中仍賜護佑非降責朕一人之明徵耶  
今者地動之象久而未定雖當日曾經

皇考訓諭曰大動之後必有微動康熙十八年亦動至一月  
有餘又曾見書籍記載明成化時地動至二十三日是  
地動經月之久亦向來之所有者然虔修人事以轉移  
天心必須君臣上下各殫其誠悃朕身居帳幕之中寤寐悚

惕寢食靡寧者已一月有餘矣凡大臣官員士庶兵丁等存心之敬肆與否朕則不能悉知但恐不知返躬自責而或生怨天尤人之念者未必無人且聞貿易工匠之流將日用必需興作必用之物勒索高價乘人於危以圖厚利甚至有克惡之徒窺伺頽垣而入室盜取財物者人心無良若此而欲不遭

上天之罪謳其可得乎此雖市井無賴小人之所為不可槩論而居官讀書之人亦未必事事可以問心而無愧用

是特頒此旨願爾大臣官員士庶兵丁等人人誠心感激

上天示儆之深恩返覆自問思過省愆不但惡事邪念急宜掃除即怨尤抑鬱之心亦當屏絕若房舍傾圯無可棲身則思人口平安乃

上天之恩也若人口稍有損傷則思己身無恙乃

上天之恩也即如日來陰雨固不便於露處之人未嘗不大有益於農田之戶此亦

上天之恩也果能如此存心則

天高聽卑必垂照察不但地土寧靜共獲安居且可永免  
上帝之譴責斷無再罹險厄之虞也朕非以地動之異卸責  
於臣工黎庶也朕之生平先責已而後責人先自勉而  
後共勉願天下臣民共知朕心

二十四日奉

上諭向來各處鹽政弊端甚多累民蝕課難以清釐多因  
鹽場大使不得其人之所致是以定議於候補候選知

縣等員之內揀選命徃令司大使之事此時該部因人  
員不敷揀選遂將監生捐納職銜之人亦入於揀選之  
內今行之二年衆人漸啓鑽營之念聞有央求同鄉京  
官出結而私相餽送者此風斷不可長嗣後鹽場大使  
之缺到部止准於候補候選人員內揀選引見不必用  
捐納職銜之人倘或候補候選人員不敷著將在部學  
習之人及留京之拔貢生令該部堂官及國子監祭酒  
等擇其為人謹慎有身家可以辦事者保送吏部以備

揀選

二十六日奉

上諭直隸水利營田吾弟怡賢親王殫數年之心力區畫經營為小民興萬世之利甫定規模而賢王仙逝遂至防護多疎隄岸漫溢朕心憂慮深恐將來日漸廢弛前功隳棄特命九卿等籌畫善後之策今覽九卿所議多屬浮辭至云凡怡賢親王所欲行而未竟者皆分別緩急次第興工此語更屬支離朕覽之甚為不悅夫已行

而未竟者則王之事也若云欲行而未竟者此乃游移影響之談巧卸其責於王矣王既未曾見諸施行則以後辦理之事皆諸臣之事若辦理妥協而歸功於王王之仙靈必不肯受朕亦不肯令王居此功也若辦理不妥而以欲行二字歸過於王朕忍聞此語乎諸臣之心亦忍為之乎當怡賢親王經理之時朱軾多病就衰艱於跋涉此衆人所共知者至於莽鵠立性情偏僻固執不通何國宗器量卑庸兼多私意祇因今歲工程緊要

一時無人可委姑且用之非謂此二人可以長膺此任  
也且朱軾莽鵠立何國宗等居住京師安能遙辦河工  
之事似應特設管理之大臣以專職任將其中事務可  
以分派於地方官者則分派辦理以減其繁劇而收羣  
策之效如此或為有益九卿所議俱未及此著另行詳  
議具奏

又雲貴廣西總督鄂爾泰奏益連土司每年願納廠  
課稅子願貢土產奉

上諭孟連地方及懲子野夷地處極邊自古未通中國總督鄂爾泰化導有方俾各輸成效順貢納厥課任土作賦虔心向化甚屬可嘉但孟連土司厥課每年六百兩為數太多著減半以昭柔懷至意其雍正八年已解司銀六百兩著將一半即准作辛亥年正課懲子每年貢納土產之時著給鹽三百斤以為犒賞

欽定四庫全書

世宗憲皇帝上諭內閣卷九十九

雍正八年十月

上諭十二道

初六日奉

上諭據寧遠大將軍岳鍾琪奏稱土魯番回目額敏和卓屯田種地恭順効力甚屬可嘉朕聞之深為喜悅額敏和卓著賞緞二十疋其種地効力之回民等賞銀二千

兩著提督紀成斌差遣弁員前往土魯番會同額敏和卓秉公賞給以示朕加恩外番之至意

初九日奉

上諭前漢軍人等懇請出兵効力朕諭該都統等近日漢軍騎射生疎平時不肯演習而務出征效力之虛名於事無益可於每旗操演兵丁一千名以備國家之用昨據漢軍都統等查奏鑲黃正黃正白三旗除常行當差之兵丁外現在輪流操演者可得一千人至正紅鑲白

鑲紅正藍鑲藍五旗除常行當差之兵丁外現在輪流操演者不敷一千人之數朕思我朝定鼎之時漢軍從龍入關技勇皆為可用及今海內承平日久伊等耽於安逸且意在文職而不在武弁是以韜畧騎射遠不如前目今官至提鎮副叅者寥寥無幾而在內簡用都統副都統時亦覺難得其人朕為此時屢於懷常思漢軍生齒日繁當籌所以教養之道而額設之兵丁為數又少似應酌量增添於國家之營伍旗人之生計均有裨益

如外省之駐防漢軍人等子弟日漸繁衍而本身之錢糧各有定數難以贍養應將餘丁令其回京披甲亦可望其成人又如外任官員之子弟往往以隨任為名遊蕩荒廢前曾有旨嚴禁悉令回京令其披甲當差習學弓馬以圖上進又如候缺之微員一時難以銓選者若情願披甲當差仍許輪班補用則在彼既可得受錢糧以為餬口之資又可預先習學弓馬以備居官之用又如內務府人丁亦衆於充役當差之外其閒散人丁撥入

八旗披甲亦可再五旗諸王之漢軍佐領仍屬本王外  
其貝勒貝子公等之漢軍佐領實無所用應撤歸旗下  
公中佐領當差且可免掣肘之弊其如何增添漢軍兵  
額及如何補充方為妥協永遠可行之處著尹泰查弼  
納石文燭石禮哈莽鵠立得祿等密議具奏

又奉

上諭各省人命抵罪之案其應輕應重朕確有所見者即  
降旨定奪若其情罪在疑似之間而擬罪在可輕可重

之際朕心不能即定者方交與九卿定議以期平允乃往往見九卿定議之案槩以減等發落覆奏如此則朕何不即令減等而必多此曲折乎凡朕交與九卿定議之案其中有應行減等者或有可以枷責完結者亦有不可寬貸仍應按律抵罪者向後務期權衡尤當寬嚴適中以副朕明罰敕法之至意

十二日奉

上諭朕自御極以來每值

圜丘大祀必親詣行禮至誠至敬以展對越

上帝之惄忱今年冬至之日恭遇

皇考聖祖仁皇帝忌辰禮部太常寺引康熙三十九年及四

十五年正月初七日祭

祈穀壇恭遇

世祖章皇帝忌辰遣官恭代之例奏稱今年

郊祀之期應照此例遣官恭代朕為此五中展轉今年不親

行

郊祀之禮於心甚為不安其如何得展朕心而又符合典則

著大學士九卿敬謹妥議具奏

十四日奉

上諭辦理軍需必得熟練之員方為有益陝甘二省州縣  
官員備辦軍需有經手數年者有經手一二年者似此  
熟練人員若因細過微瑕即行參革則接任之員初辦  
軍務未免生疎或至遲誤亦未可定嗣後陝甘地方辦  
理軍需之州縣官員若無大過其所犯情有可原者著

該督撫揆情度理量加寬宥若錢糧有些微不清之處而事屬因公者統俟大軍凱旋之後查核明白以定功過

又雲貴廣西總督鄂爾泰奏報烏蒙逆蠻背叛情由奉

上諭烏蒙逆蠻背叛已頒諭旨遣發官兵分路進剿總兵劉起元既苛刻於平時又不能防禦於臨事麤疎暴戾自速其辜惟是遊擊汪仁知縣賽枝大等倉猝遇害累

及妻孥深可憫惻著總督鄂爾泰查明具奏加恩賞恤  
至於烏蒙蠻衆其性反覆靡常朕常慮其不能帖然寧  
謐今年春夏以來朕躬違和精神不能貫注及此鄂爾  
泰於夏秋之間身亦抱恙而烏蒙遠隔千餘里豈計慮  
之所能周不但朕所深知亦中外所共諒也况鎮臣劉  
起元撫馭失宜防範鮮術事由激變責有攸歸該督引  
咎自効並請解任督師之奏大非朕心其節制滇黔川  
省各路兵丁之處仍遵前旨行

十六日奉

上諭年來出征之兵丁在外支給口糧而仍給與坐糧以養贍其家口蓋因兵丁荷戈持戟効力戎行不忍令其稍有內顧之慮也至於各省土兵有派撥征勦者則於起程時賞給銀兩而無養贍家口之例朕思本身遠出在外則於營生之計不能兼顧其父母妻子或至俯仰無資深可軫念嗣後土兵之出征者除恩加賞賚外其父母妻子在家照守兵坐糧之例每月給銀九錢并米

三斗米則折銀賞給著督撫提鎮差委官弁前往該地方會同土官秉公散給務令均霑實惠儻有侵蝕和尅等弊一經發覺定行從重治罪決不寬貸目今雲貴川廣等省効力之土兵即照此例行並將此旨通行曉諭各省土兵知之

十七日奉

上諭向因大興宛平二縣近在輦轂之下常有速辦之事不得不那移庫銀以濟用而上司察知每以虧空題

叅至於罷黜治罪實為可憫用沛特恩於大寃二縣各  
發庫銀一萬兩存貯該縣倘遇有速辦之公事准其詳  
明府尹動支應用此朕體恤有司之至意也近思辦理  
軍需之州縣其急切應付之處不容刻緩而該州縣並  
無存貯備用之項若擅動公帑又干嚴謹有司實處兩  
難不可不為籌及朕意欲於辦理軍需及事務繁劇之  
州縣亦仿大寃之例酌留帑銀以備急切公事之用其  
如何舉行俾辦公有賴而弊竇不生著大學士會同大

將軍岳鍾琪總督高其倬悉心定議具奏

又奉

上諭陝西四川地方民風醇樸歷年逋賦甚少查每年徵收錢糧之期四月完半十月全完此定例也朕思四月十月既屆納課之期小民必須預先經營是麥穀未收之時即為輸將之計或因稱貸而受剝於富豪或因預糶而大虧其價值且如甘肅地方有徵收本色者若在糧穀未獲之前更為竭歷歷來川陝錢糧既無拖欠之

陋習著將四月完半者寬至六月十月全完者寬至十一月俟夏麥秋禾築場納稼之後從容完課俾民力紓徐以副朕愛養黎元之至意

十九日奉

上諭向因四川地畝隱匿甚多以致姦猾之徒欺其疆界不清契券無據侵凌攘奪告訐不休種種弊端不可枚舉此天下臣民所共知者是以數年來內外諸臣奏請清丈者不下數十人蓋以田畝隱匿不但無益於國課

亦且有害於民風朕再四思維始遣科臣高維新等前往川省會同道府州縣官料理清丈之事又復切加訓諭期於公當均平無偏無刻並降旨遍諭川民若有屈抑下情准其於督撫欽差前委婉陳訴及丈量之事將竣又頒諭旨若有額量稍重之州縣即比照就近適中之科則令其核減以紓民力蓋地多糧少者則當按則增加而地少糧多者則當查明減免此朕之本意屢經曉諭該省巡撫及辦事諸臣俾各悉心奉行者也近聞

該省州縣中有地少糧多之處乃歷來地方官勉強加增者此番清丈並未核減即如成都華陽邛縣溫江等處便是如此則其他州縣或尚有與此相類者亦未可定著巡撫憲德轉飭布政使高維新等再加確查細心斟酌若有糧賦稍重之處即據實奏請核減毋得固執已見回護從前有負朕均賦恤民之至意

二十二日奉

上諭山東今年偶被水患特命大臣會同巡撫查賬有房

屋傾頽者賜以修葺之資并大發倉糧計口授食又准總督田文鏡之請將青菜登三府州縣存貯倉穀及通省捐監穀石照時價平糶其奉天米販商船亦准到東貿易是東省小民今歲三冬糧食有資可以無慮但恐明年青黃不接之時米價或致昂貴不可不預為籌畫朕思奉天連年豐稔各州縣倉儲及莊屯收貯皆極充裕且與東省一海之隔順風揚帆一日可達應趁此時北風之便將奉天近海州縣存貯米糧運送二十萬石

至山東海口交與地方官俟明年二三月間照市價平  
糶於小民甚有裨益著都統祖秉衡刑部左侍郎王朝  
恩前往奉天會同將軍府尹辦理其米石或雇民船或  
用戰船及作何運送之處大學士等詳議具奏

二十三日奉

上諭烏蒙逆蠻不法雲貴四川現在用兵征勦聞川省之  
永寧建昌地方山路崎嶇所用軍糧皆湏民夫背負方  
能運送非若坦途之可以車馬馱載也舊例每糧一石

運送百里給與腳價一錢而民夫一名止能背負米糧三斗百里之程須行兩日以此計算是百姓一日之所得無幾未必足以供其日用之資所當酌量變通以綠民力著該撫即行確查凡川省有山路險峻之處運送軍糧須用人力與永寧建昌相類者將腳價速議加增一面奏聞一面即行給發其他雲貴等省若有似此腳價不敷之處亦著該督撫確查增添仍一面奏聞此朕格外之恩該地方有司務當實力奉行禁止侵冒等弊

使力役之民實沾恩澤

金匱要略卷之二

卷九十九

世宗憲皇帝上諭內閣卷九十九